

四庫全書

集部

欽定四庫全書

集部

舟州四部稿卷三十五
六

詳校官侍讀學士_臣陸伯焜

中書_臣劉源溥覆勘

總校官原任中允_臣王燕緒

校對官檢討_臣慮應

謄錄監生_臣魏廷勳

欽定四庫全書

弇州四部稿卷三十五

明 王世貞 撰

詩部

七言律九十六首

送張肖甫徵金嶺西道便道還蜀

薊門掾甲待邊烽海內軍須不自供
赤羽去看新使者黃金歸隸大司農
界標銅柱天垂盡人過蒼梧瘴幾重

聞道壯游仍衣錦春來車馬醉臨邛

其二

沽酒斜陽雙玉珥佩刀寒色映都亭相論白雪無先後
一別青春有醉醒南去風烟仍泯泯北來天地漸冥冥
即看十道衣冠使回首何人哭漢庭

于鱗貽詩見懷云上計非遠率爾志喜

美人贈我珊瑚鈎十五方城趙璧愁睥睨雄風生鹿野
縱橫藝苑割鴻溝白虹寒貫中原日赤幟高懸大鹵秋

豈謂吾曹能氣象稍聞車馬發邢州

秋日登毘盧閣

上方臺殿白雲深處處旃檀有布金法座噓烟盤寶樹
香池浴日滿祇林憑欄一氣河山合振鐸諸天帝釋臨
搖落登高吾不恨已從初地變塵心

于鱗至分韻得鳴字

把酒千門朔思生太行高雪照天京道傍燕石畫俱隕
匣裏并刀風自鳴遂有羣靈開黯淡即看五馬頓崢嶸

相違歲月無勞數屈指人間幾大名

又得永字

自擬僊舟問李膺濤聲寒壓九河水愀然嘯日思雄劍
忽爾垂天至大鵬過客傳書成詛楚

客方傳于鱗
絕謝榛書

逢予

頌酒尚如澠請看寂寞華陽館海內何人有代興

除夜于鱗明卿子與見集分韻得齊字

辛盤栢酒故人攜醉裏無愁白日低歲序風塵俱自失
吾曹天地豈堪齊吟探萬象春誰在把照千門夜不迷

詰旦如聞周太史何來雲物帝城西

明卿席上贈別于鱗分韻

疊鼓鳴笳出薊門停驂回首視中原病餘丘壑吾仍在
別後風塵爾更尊豈為衣冠成落魄向來詞賦失銷魂
何人泣對陵陽石車馬紛紛未可論

被命省獄畿郡有述

春草翩翩使者軒高從北極俯中原寧勞繡斧誇三輔
自有金鷄下九閣車轉普天思禹泣網開何地屈湯恩

僅知刀筆文無害敢向清朝借不寬

子相席上別諸子分韻

醉爾春風金屈卮忽看山嶽坐來移停鞭欲盡幽州色
立馬愁聽出塞辭我自青雲甘薄宦誰當白雪問相思
向來天地能烽火搖首人間未可期

香山晚眺

千峰擁黛出憑欄涿鹿蒼蒼指掌看落日徐收天地色
飛泉不斷古今寒坐來清楚彌三界行盡丹梯隱百盤

便欲舍身從此住漢家車馬動長安

宿香山寺

白雲深鎖上方幽躡屐無勞問惠休竹裏布金千月至
松間鳴玉片泉流談經石聽蟾蜍轉卓錫天迴罔象愁
坐久忽驚心地淨向來西竺在南州

李兵使蓊邀游密雲城樓

麗譙高擁白雲愁多暇相攜此壯游萬馬春齊新制府
千山日靜古檀州河邊亭士投醪足幕裏論兵借箸壽

君自大夫諳故事却從王粲問登樓

高司農趙憲使共游崆峒山二首

並馬崆峒天地懸
薊門樓堞漸蒼然
千峰北斷祁連色
萬井東迴碣石烟
倚杖白雲窺檻外
振衣明月墜松巔
頻誇斥堠無烽火
屈指單于出塞年

其二

搔首狂吟破渺茫
坐當雲色據胡床
風迴鼓吹填哀壑
日擁旌旗颭大荒
息甲晝閒都尉府
飛芻春滿度支章

毋輕北望投杯意使者長纓請未央

于鱗還郡後未有遷命賦此寄之

揮手東風滿客裾
薊門青草立踟蹰
何讒季布仍為守
未病虞卿好著書
別去雲霄推翫醴
愁來天地借吹嘘
還應濟上千秋月
已照邢州五馬車

盤山

恒嶽投荒杳不迴
帝令盤嶺鎮燕臺
層巒不盡青天去
亂瀑雄爭大壑來
共指丹梯安薜荔
還扶蠟屐破莓苔

銀河只在微茫裏欲取寒杓作酒杯

其二

千盤歷盡更茫然回首中原暝色前
峽轉琳宮藏皓月峰排紫劍插遙天
雲根檜坼龍鱗起磴道泉歸玉乳懸
深夜不須驚鼓吹看予箕坐嘯風烟

漁陽道中有懷予相考功却寄

回首招提擁傳初北風吹盡故人裾
燕京裘馬安危外薊苑關河戰伐餘
聞道酒狂緣病減也應詩態畏名除

抽簪漸入山公計中散翻慚有絕書

過故張職方有贈

春風使者出長楊斗酒相過夜未央爾自歸來愁醉尉
誰將名姓問降王絲綸不盡青雲偃漁獵頻輸白日長
聞道普天猶戰鬪可能無意向明光

贈薊州周都督

當年突騎滿漁陽幕府寧空赤白囊一自軍容開細柳
能令烽色避長楊揮鞭坐畫樓煩地鳴鏑遙飛瀚海霜

馬上鏡歌平寇日好翻新曲顧周郎

答茂秦

漳河雪色捲飛濤來徃雙魚尺素勞
大國可能忘醴酒故人猶自感緜袍
虛名歲月容詩損薄祿風塵倚醉逃
莫問薊門驅傳事不如湖海卧能高

贈別陳信可比部使閩便道還吳時
兩地俱有鳥寇之警

馬首春星雙玉珂五陵花發奈君何
俱稱使者朝天去

獨有樓船駕海過野戍烽烟諸粵滿人家雨色八閩多
歸逢父老無相難好請長纓繫尉佗

土木驛

夜色蕭條鐵騎重曾驚磷火散千峰蛾眉幸不歌黃鵠
魚服愁仍困白龍地濶金甌元浩蕩天迴玉輦轉從容
因揮二晉千秋淚于石真成勒景鍾

鷄鳴山響水鋪

金文靖北征記唐文皇征遼駐蹕此山鷄鳴故

云成祖北征亦駐此

峽擘沙平莽蒼迴唐文東討此登臺旌旗尚閃千巖日
鼓角猶驅萬壑雷龍起風雲寬自護鷄鳴天地劃初開
六飛重見中興主不數燕然一將才

度居庸關

代北平沙萬馬羣率然山勢擁氤氳層關不閉中原日
絕壁長留太古雲地脉誰憐秦內史天驕應辟李將軍
千盤轉見媯川水遙夜悲笳未可聞

其二

七陵佳氣鬱蔥哉，睥睨寒烽北極開。
車轉天門通箭括，水排坤軸建瓴來。
書生絕質無中策，大將犁庭有異才。
邊馬莫移青海帳，漢家曾記白登臺。

上谷督撫諸公修諸邊有感

漢家車騎數移屯，烽火何當慰至尊。
實有諸侯城上谷，虛勞萬馬粟中原。
朝廷豈問于懸詠，使者寧為鞅掌言。
北望王庭今咫尺，國殤零落畏招魂。

答李侍御

鳴笳落日氣蕭哉，睥睨寥天首重迴。
何地霜停驄馬色，孤城春自帛書來。
層關歲月猶遺險，大漠風塵未易才。
方畧故應饒起草，建章宵几待君開。

五月五日李侍御以詩見邀走筆有答

空堂卧起倦流鶯，郢雪篇來始自驚。
競渡可應非我意，獨醒還見古人情。
尊前續縷忘為客，塞上探符有辟兵。
聞道侍臣偏賜扇，憐君白羽滯孤城。

與朱憲懋學夜訪保安沈子鍊有作

結駟翩翩過酒徒何妨犢鼻對當壚
荒城燧色生春晚野戍砧聲並月孤
為問上書勞謁者那如結客取單于
觸欄東墮長庚色猶自狂吟擊唾壺

塞外得李伯承比部見寄詩有感

薊門春草易臨岐回首風塵始自悲
鴻鴈書來明月戌故人吟罷白雲司
曲中楊柳知相憶別後刀環未可期
聞道朱絃多悵望莫將流水受人疑

絲塞外歸夜宿城西遇子相有作

大漠風塵使者迴
片虹秋色故人來
高歌驟立荆卿髮
萬事都深阮籍杯
聞道江湖新逐客
却論天地故憐才
誇君並馬邢襄道
彩筆參差太麓開

行部高陽遇河決不浸三板遂成二首

投馬虛疑楫石成
射蛟或恐海神驚
陸沈玄圃千峰細
天倒黃河萬堞平
漸老中原魚沸鬱
欲歸南極虎縱橫
濁醪誰是高陽侶
遙夜窮愁白髮生

其二

急雨驕風萬穴穿古隄殘壘散秋烟雪山橫捲城闈入
銀海高從樹杪懸將為漢年趨瓠子豈應吾世失桑田
天門欲叩驚真宰未許乘槎向斗邊

遇于鱗人云當上計臺使留為代報喜而有作

驂駟宛轉又朝天驛使遙將借寇傳漸有少年刀筆近
豈因三輔壘書偏石門相贈青山色太守秋題紫塞烟
在昔詞人虛領郡當令揚馬愧先賢

過故人趙參議飲時以病歸

當年紫馬去長安豈謂風塵早挂冠
叢桂長謠明月夜據梧清枕白雲寒
共思河朔諸賢飲還問平原十日驩
我醉欲為歌伏櫪恐令如意碎琅玕

惲光世過于鱗邢州見懷出示有答

使者邢襄擁傳遲遙從玉樹寄相思
省中華月秋誰在曲裏高山晚自疑
豈謂中原仍握手又從吾世見論詩
憐君北走幽州道易水浮雲片片垂

秋日過于鱗郡齋分賦十二體得河字

飛傳霜橫九塞戈為君風雨又滄沱相憐白壁燕關盡
未有黃金漢詔過坐客尊醪初北海郡人經術似西河
不知清羽頻移調蕭颯城頭落木多

于鱗邀登郡樓分韻得秋字

使君杯酒一登樓倚檻蕭條木葉愁不盡天風吹大陸
何來嶽色滿邢州匣中星動雙龍夜柝裏寒生萬馬秋
為問郡曹諸記室幾人能並李膺游

其二 得雲字

迴轉丹梯入斗文
峒堯飛閣瀕氤氲
尊前樹裊漳河色
檻外鷗盤大鹵雲
矯首風塵驅混合
撫膺天地劃中分
狂來被髮歌相和
清角人間未可聞

送盧次楸游建康因謁故濬令陸君陸嘗出次楸
獄

虛左侯生未可呼
短裘仍脫酒家胡
自矜然諾青雲少
不盡衣冠紫氣孤
垂老中原迷抱玉
故人滄海問銜珠

石頭高並燕臺起詞客何當誦兩都

月夜發大名謝茂秦顧季狂追會衛河舟中作

月擁層城萬堞開天垂極浦片帆來如霞獨賞長康語
似練還驚謝朓才拂袖中原堪落拓曳裾公等重徘徊
亦知為俠輕分手明夜誰同酒一杯

喜于鱗視關中學因寄二首

側目其如鄴下名談經仍貴濟南生天迴太華風前色
地坼黃河雨後聲遂有墾書高北斗欲令詞筆重西京

毋論王貢彈冠事即使漁樵氣亦平

其二

矯首邢襄秋色迴大河雄劔莽風雷人龍自起中原卧
天馬爭從西極來所至儀封應為請重過關尹未須猜
寨帷落日僊人掌好畀芙蓉露一杯

送徐汝思參議之山東

散帙明燈至故人焚魚酌醴坐相親未論開府諸侯貴
且數游燕萬事新說劔寒星高北斗寨帷春雪滿東秦

憐予莫歎薪從積留得朝來爨下身

通州署中雜興四首

潞城高望白雲翔濁酒殘花興未央
總道除書同逐客何妨抱案且為郎
鬼神元自饒宣室魑魅那曾止瘴鄉
散地陸沈無不可于今孤匣捲秋霜

其二

隱隱鳴笳萬木秋聊從騁望一登樓
野夫獨坐且青眼何物窮途能白頭
睨西山寒塞色帆檣北斗挂河流

誰言尺五瞻天處極目浮雲迥自愁

其三

似聞天地厭縱橫幕府秋閒白羽聲一嘯玉關迴萬馬
長驅滄海失千鯨清時豈少安危計薄祿誰論去就名
好買吳船春水發向來農圃未須輕

其四

疎風故裊挑燈坐落月猶窺擁被吟不謂文章真貴汝
自綠容鬢轉關心千秋未肯隨揚馬五嶽那能訪向禽

稍待著書辭祿後，細分殘日與叢林。

答兵憲汪丈伯陽

君時以却敵功不錄

春風粉署並含香，矯首秦天散渺茫。
乍有雙魚論故舊，始知千騎領東方。
功成介子恩元薄，書就虞卿去不妨。
我自拂衣秋色裏，期君可在五湖傍。

寄子與

荒城濁酒駐寒驂，霜老楓林萬木酣。
薄宦詩名空海內，故人秋興滿江南。
書來破塚仍無恙，別後單衣轉不堪。

肯道草玄偏寂寞看君他日勝桓譚

獨酌

孤城轍跡自來稀濁酒青燈暫掩扉敢謂雲霄他日異
豈應風雨故人非時名且助潘生拙宦業誰憐邴氏微
回首東山俱小草可堪薜蘿問初衣

夢明卿棄官歸醒而有寄

夢爾秋風出豫章還如陶令赴柴桑折腰手板青雲外
回首巾車大道傍自是江湖新氣象豈令辭賦獨輝光

覺來孤枕山城裏愁望吳雲萬里翔

被青州命後得伯承寄詩率爾有答

立馬寒雲擁塞迴蕭條西望一鴻來故人青玉吟為紫
上國黃金別起臺海岱長懸開府色風塵倘許佩刀才
知君豈少高陽侶被髮狂歌轉自哀

送汪丈伯陽兵憲謝病歸

幕中談策擬穰苴可向明時賦卜居卧病白雲生
歸來秋色滿琴書自言司馬游多倦無那原思憶不如

他日相逢花裏醉知君弟子有籃輿

其二

開府秋霜祭戟新能令萬馬肅駢頭班氏非難相
龍性嵇生未易馴還向五湖論日月自因千古厭風塵
拂衣吾更慚吾語倘許珊瑚並釣綸

赴青任曉行滄州道中

喔喔荒雞啼不休城頭擊鼓導鳴騶自憐岐路幾時盡
即厭衣簪何處投舉目風雲還一哂塞帷星斗忽羣流

何人為致新豐酒，賸有詩篇緩客愁。

立春前一日過尹汝漁副使飲

東走齊河冰雪開，鬱葱佳氣近樓臺。
相逢臆向尊前盡，敢道春從使者來。
落日千門過鴈色，黃雲一騎按鵬迴。
知君且住袁絲里，陸博酣歌未易才。

丁巳春余以青臬朝衙王賜宴殿中大雪有述

使者朝逢玉樹留，君王設醴殿東頭。
鱗鱗積素分鴛甃，片片飛花點翠裘。
上客無慚梁苑對，何人不羨雪宮游。

酖顏緩傍雕欄出欲唱陽春自寡酌

發青州兵有感

聞道司空初奏凱似傳天子又推輪
人間白羽兵符峻海上黃金劔氣新
待發臨淄七萬戶橫行即墨五千人
不知誰是封侯骨矯首中原涕淚頻

真珠泉宴賞

嘉泉靈沼向齊稱百道清涼地底騰
炯炯驪珠迴夜色盈盈鮫淚奪秋澄
初疑碧漢翻金粟忽憶明河寫玉繩

最是沾恩歌湛露，賜來尊酒又如澠。

泉亭春夜汎舟

離宮疊島象瀛洲，飛蓋仍追鄴下游。
樹裏晴雲迷畫舫，城邊春月吐朱樓。
鯨鬚漸隱千年石，龍首新疏九折流。
莫怪仲宣先辟席，諸君賦豈減應劉。

贈殿卿遷德相

塵尾羣賢容薊門，還容許掾擅清言。
如何三輔憑熊軾，却向諸侯乞兔園。
傲吏白雲眠海岱，新詩秋色滿中原。

無疑席右頻推簡自是相如賦最尊

春夜飲李伯華少卿

今夕何夕春風前銀燈照醉炯不眠牙籤縱橫十萬卷
肉譜上下三千年曲中白雪調誰和屏裏青山神與傳
為數名園奇木石不知若個讓平泉

還過李伯華里不及訪

駐馬春城落日斜城闌恰近子雲家寧因刺史開三徑
敢向中郎乞五車入坐登龍應自許過門題鳳欲誰誇

何時更接懸河口好借寒波漱齒牙

張文久不調戲惱之

憐君日日探除目不見長安奈爾何齊客祇知綠木易
漢家元自積薪多飛花歲月淹高枕濁酒風塵起浩歌
問道板輿堪就養莫將潘賦怨蹉跎

答黃文選德兆

漢京冠蓋自如虹高枕青山道未窮一吐雄談傾稷下
數成新語附齊東科頭偃蹇天風合倚杖蒼茫岱色空

徃徃中興名士傳知君江夏舊黃童

其二

曾辭藻鑑卧烟霞桃李青春尚自花四海衣冠新啓事
百年書卷舊生涯歌風乍許吳人識和雪誰將郢調誇
聞道里中多載酒倘容玄草付侯芭

讀大復先生詩因遺其甥袁將軍

舍人罷視西京草寂寞空城付野蒿海上虛憐騾裹骨
人間尚有鳳凰毛河盤砥柱千流轉天入中原二曜高

聞道將軍成宅相不妨詩卷屬弓橐

萊州道中與汝思望海有作

攜君躍馬最高峰海色蒼然盡漢封
落日層波明玳瑁青天孤嶼削芙蓉
洲邊大核僊人種浦外靈槎使者逢
指看白雲殊天矯不知何事但從龍

送張彰德入為兵部郎

張嘗為庶吉士御史

回首埋輪哭漢堦主恩愈重賜環時
漳流不入長沙遠宣室何煩賈傅悲
中秘舊傳黃石法入朝新拜縉雲司

留君待對紆三表莫怪單于繫組遲

喜吳峻伯來視山東學寄

清朝詞客白雲司不減風流鄴下時
一別瑤琴長自掩
經年尺素轉相思
除書曉動燕山色
握手秋迴太嶽姿
為道黃金酬汗血
敢將青鏡悔蛾眉

其二

為報故人吳季子
壘書何日下山東
天門瑤草春相待
海上僊槎夜擬同
過魯好傳周室禮
入齊還問太公風

欲知郎舍期君意孤劍時時但吐虹

提兵安東海上大閱二首

親提千騎向東方
劍客材官盡束裝
桃葉初銜珠勒馬
梨花半吐綠沈槍
拍天濤擁軍聲合
駕海雲扶陣色揚
莫笑書生無燕領
斗來金印出明光

其二

虛聞淮海鬪長鯨
十二關河迥不驚
鳴柝夜傳千竈火
建牙朝列五家兵
城邊星斗崢嶸出
馬首風雲指顧生

不似南征諸將帥羽書時共橐縱橫

素將軍邀飲蓬萊閣和汝思作

懸梯閣道倚蓬萊地盡天空鴻鴈迴日似海人珠捧出
山疑秦帝策驅來千秋未假徐生藥六月長留素紹杯
為問異時陵陸改始知塵世有僊才

送馬太史封衡藩還朝

初見從天六傳臨為開青社剖黃金齊風未敢誇東海
漢使能無誦上林把袂千家生岱色談詩孤月破城陰

故人還有如澠酒翹首雲霄不可尋

賊退後答黃德兆先生談兵

淮海帆檣破浪舒幾家新月怨離居綠林自是無殊相
黃石今逢有秘書屈指風塵榮寵後側身天地戰爭餘
知君早晚吟梁甫抱膝誰堪問草廬

送周郎中守大同

誰言春色漢關窮漢使乘春有畫熊為問馮唐淹省署
何如魏尚守雲中嚴城月靜千烽出嘯閣風迴萬馬空

保障自來明主意不須長劔掃崆峒

送吳博士為齊藩相地還朝

十二關河氣鬱芊誰將漢節御風烟自來玄鳥能司正
况復青烏與秘傳彌海車旂雲夢對如天鐘鼓雪宮懸
何當又厭王門醴欲向螭頭報有年

答張仲舉

十年曾識鳳凰毛回首風烟夢寐勞書到關河雙玉案
賦成湖海一緇袍握中明月誰相貴曲裏青山且自高

聞道漢廷推仲蔚莫令秋思滿蓬蒿

馬太史負圖過園亭作

梁園脩竹賦誰傳總為相如席更前萬里關河秋月共
十年湖海歲星偏吟蟬露葉時孤抱坐鵲風枝忽對懸
來往深杯應莫拒舊游回首各茫然

博興止宿即景

下博城空生晚烟黃茅白葦秋茫然魚鷹獵水貪不定
鴈奴踐更窮可憐豈無西郊乾走馬亦有東陂寬放船

醉人眼鼻捩軒冕耐可杖頭挑百錢

即事

文皇卜鼎古燕中三見明堂象魏崇
禳火新開屬玉觀祠釐別起甘泉宮
楚江雲擁千章下蜀嶺天排萬樹空
未論岌岌迴北斗即防搖曳動秋風

其二

未央雙闕尚逶迤誰誦班生賦裏辭
今日天心懸北極向來民力盡西垂
通侯績幣貧難薦少府黃金橫不支

擬助曼容殊薄祿將從卜式鮮高貲

春日閒居雜懷十首

據梧空館暫婆娑回首殘花夢寐過
末路逃名吾計晚青春逐客故人多
詩篇不獨疑冠蓋燧色猶聞隱薜蘿
去就至今無一可漸令華髮怨蹉跎

其二

十載諸賢侍法垣一麾東海更銜恩
亦知丞相多開閣無那書生畏掃門
歲暮風雲偏有態春迴天地竟何言

饒他坐客輸文舉自插繁花傍酒尊

其三

開府春來乞五湖璽書舟楫寄深圖誰依日月裁龍袞
獨向星霜握虎符軍事祇憑雙鬢識主憂還借一身扶
那堪欲下楊彪淚矯首青雲阮籍途

其四

有弟經年客薊城愁看棣萼劇縱橫艱危漸往書難盡
涕淚仍枯意未平自惜空言終付汝莫令他事亦如兄

漢家循吏黃金貴
牢落儒林誤此生

其五

推案空庭意悄然
偶緣行飯向花前
雲門午色來高坐
海國春寒攪獨眠
千石已慚過
邠奉二毛應
惜到潘年
縱因踈誕妨
知己惆悵
何人為守玄

其六

漢省委蛇白玉琚
即看高議主恩虛
何人北海憐精衛
有客東門類爰居
事往交游工變態
時平偶語畏詩書

亦知身世俱萍梗泛泛江湖恣所如

其七

紫氣函關客過迎誰堪起舞應鷄鳴
千年秦華東西色
萬里江河日夜聲自是文章生骯髒
豈容吾輩聚崢嶸
尤憐奉使還徐幹金馬何心老帝京

其八

閩嶠除書問莫悲豫章遷客正相思
但令懷壁俱堪罪
何用投珠始見疑
天外風流名士盡
鄴中星散舊游知

祇緣吾在能株累漁海樵山並所之

其九

故人相慰檄書稀又見徵兵解越圍敢向東方誇賜履
可因南國賦無衣家家砧杵鳴春月處處戈船繫夕暉
聞道封侯須健手羽林生長自輕肥

其十

小石疎筠興未闌坐攜詩卷對盤桓折腰吾道差無恙
銷骨人言轉自寬張執敵傳廷尉業阮生寧戀步兵官

吳門萬頃滄浪在好傍深林選釣竿

弇州四部稿卷三十五

欽定四庫全書

弇州四部稿卷三十六

明 王世貞 撰

詩部

七言律九十一首

奉答于鱗四首

浮雲幽鳥訟庭閒
賦就懷人且自刪
病後青山添傲骨
書來落日破愁顏
微名漸損終難盡
薄祿猶耽未擬還

豈若使君高擁傳能令春雪滿函關

其二

絳帳諸生侍馬融
憐余投筆乍臨戎
自來肝膽無離合
肯向衣冠數異同
灑灑西京還漢日
泱泱東海更齊風
男兒姓字羞文苑
矯首狂歌萬古空

其三

馬首楊花吹暮春
鴻邊尺素迥傷神
飛揚跋扈當年事
歷落崎嶇我輩人
不辨淄澠中自解
即論涇渭向誰伸

煩君試看燕京態
汲黯那能社稷臣

其四

聞道黃河尚倒行
秦中車馬失崢嶸
石鯨寒雨將無動
銅雀條風可再鳴
天地祇今安戰色
故人何處傍詩名
高秋倘過蓮花掌
却憶蓬萊海日生

同徐汝思登雲門山作

芙蓉削立郡城西
躡磴捫蘿徑欲迷
忽有青天穿箭括
初疑壁月挂瑤梯
雲根半壓千峰小
海氣遙吞萬堞低

搔首狂歌吾不厭莫驚風雨妬新題

其二

十二齊封自鬱然
盪胸秋色鎖層顛
危崖日月時雙墮
急雨蛟龍乍一穿
鳥道白從杯底落
薜衣青入鏡中懸
誇君更有天門在
策杖春褰萬壑烟

雪後登城樓

城抱寒譙聳翠微
雪留層翼玉鸞飛
先風萬樹搖晴色
及暝千門破曙輝
搔鬢青山吾並老
決膺玄鴈未同歸

如何賦手仍王粲倦向人間袒褐衣

送陸仲子之嘉善校官

陸仲子少負不羈之才宏博縱肆徃徃對客千
言一揮珠璣錯落金石錚鏦雖素稱豪文章者
口噤手奪莫敢支梧老復不第低眉選人楚衣
蹇衛奔走冰雪於乎窮哉每酒語慷慨倘得一
官王子必有文敘其抑塞磊落也予謝不敢亡
何予出鎮淄青仲子乃司訓嘉善刀筆總總亡

以伸諾矣因姑為詩一篇而志其末

送君初釋芟荷裳雙鬢公車已自蒼雪後片帆過橋李
春時三賦擬長楊青瑣故物行須惜絳帳談經卧不妨
工瑟向來慚帝里五陵裘馬少年場

歲暮偶成

回日牽風未擬晴碧紗沾塵篆烟橫倦探書卷渾無味
閒憶交游倍有情啄雪饑鳥時一下搏雲高鶴忽羣鳴
呼兒濁酒還須酌莫放人間百感生

聞家君蒙恩復御史大夫喜述

雙節遙傳下赤墀
主恩誰分賜環時
聲迴挿羽金城在
色動飛章玉几知
自信星辰天北拱
無論風雨日東垂
向來庭訓唯精白
肯為封侯請戒詩

除夜作

野夫痴坐獨何事
屈指俄成三十三
盤欲頌椒驚薊北
戶當添梗憶江南
沅年漸舊真難挽
萬事更新未擬諳
入眼祇應雲日在
可憐春色滯抽簪

題方子元煥西郭草堂

小逕茅堂負郭寬，祇須題字便迴鞍。
牀頭牘有龍鵝帖，篋裏能無註鷓冠。
卧壁龍蛇春欲動，宿楣雲霧晝長寒。
知君愛寫狂夫句，倘許淇園竹數竿。

答贈谷明府嗣興

蚤聞垂索大江還，謝病春深薜荔關。
豈為避仇之海上，欲留題句滿人間。
樽前白苧空矜調，鏡裏黃金可駐顏。
我亦元龍無客禮，雲門碧樹許誰攀。

春日同吳峻伯提學游雲門分韻得門字

莽蒼闢城指掌論，依微刻碣洗苔存。
千林雪盡俄全出，一柱雲扶迥自尊。
歌罷君詩爭海色，醉來吾屐亂春痕。
吳山鹿豕交游在，怕有藤蘿閉石門。

人日逢春

勝花繒幟巧相宜，栢酒條風拂座遲。
已遣王春新物色，重教人日起吾詩。
狂看天地誰容汝，暖問冰霜更幾時。
朋舊祇今零落盡，匣中沅水但堪疑。

奉寄客部朱文子价戲效其體

白門啼鳥雙垂楊主人讀書殊未央
經霜柿葉已滿屋過雨薜荔將窺床
十年清夢飛天姥幾度新詩走夜郎
為聞青州使君態胡纓小馬綠沈槍

于鱗寄余登華諸篇走筆奉答

落日中原太華陰客攜秋色獨登臨
俄添嶽掌蓮峰峻忽入關頭紫氣深
六箸僊人邀對博三漿玉女醉還斟
誰憐此地餘秦觀西望雙懸萬古心

送周侍御按督河中釅政

列栢臺嚴瀕大河飛霜六月馭驄過中條對聳青蓮色
砥柱平迴黑水波禹跡銘山誰並遠齊功賁海未堪多
知君更有賢良議好在明光白玉珂

奉寄少司馬麻城劉公公繇山東遷某嘗備屬吏
有知己之感云

採藥徵金幾道看兼逢飛檄募材官青燈夜濕封章雨
白髮秋添露冕寒恩在閭閻深涕淚事新刀筆轉艱難

欲知國士平生感齊缺商歌久罷彈

其二

鳳城山抱古時臺立馬徐瞻紫氣開東海暮雲吳地共
大江春雪楚天來安危鎖鑰真煩寄轉戰樓船實未迴
倘問平原門下客幾人元是處囊才

清明雨中過穆陵關

穆陵關頭峰削懸哀颼漉漉吹奔泉誰令冰雪暫成雨
豈為清明方禁烟桃花欲紅不肯應柳條即青猶未眠

南人過此淚雙落耐可吳江十月天

過王烈婦祠祠有丘給事記

徑仄祠荒客倦者鄉人伏臘自衣冠疎篁禿栢晚何意
伏雪淹霜春未寒尚有生芻堪薦玉豈因黃絹却迴鞞
男兒七尺應無限矯首風塵萬事難

奉贈少司馬麻城劉公統京營兵二首

動色除書有大名楚材誰復並干城東征已盡諸侯履
左袒仍將太尉兵萬馬停鞭迴夜嘯九關飛檄散秋聲

由來建信多奇策肯為匈奴論舅甥

其二

壇成車轂帝親扶匣裏吳鉤玉轆轤持節盡監諸校尉
請纓還繫五單于期門畫靜團牙戟畫室秋嚴下虎符
却憶華容舊司馬孝皇頻按九邊圖

兵後問訊華師學士山居

十年供奉避晨鷄西掖苔綠學士題青徑總輸桃李在
碧山還妬鳳凰棲書成日月私巾屨業盡乾坤厭鼓鼙

聞道農耕諸稍復可無蘭蕙長春畦

夜登城東角樓和峻伯得樓字

橫吹春登百尺樓使君中宴解吳鉤離宮月送雙螭出
極浦烟雉萬雉收盡履青天垂大峴開尊碧海寫滄流
虛為賦客悲非土何處風塵不壯游

得河中王文憲副地震後書云未有出山之耗賦
此促之

秦關晉峽莽相衝地轉天推妬禹蹤不改黃河噴雪霰

猶存砥柱插芙蓉中流歲晚迴鳴犢大壑春深起卧龍
膝抱缶歌雖足戀請纓飛馭莫辭從

贈別俞丈汝成遷楚廉訪

別筵仍賦紫貂裘黃鶴摩天不可留雪後抗旌雲夢獵
月明張樂洞庭游詩成自失巴人調宦就應寬楚客愁
倘問故交留滯意周南或恐是青州

吳峻伯過蕪隱齋有作

隱囊紗帽竹間亭濁酒絃琴眼自青卷幔碧山堪入供

窺簾黃鳥故要聽
鑪香坐展來禽帖
茗椀談過相鶴經

時出古墨刻為
玩兼有餽鶴者

但道雲中家更好
野夫今夜客為星

徐少叅邀飲蒿里偕李張二憲使作

殘日輕雷挾亂岡
使君高宴許誰狂
振衣名字新東嶽
回首旌旗滿少陽
有客琴彈司馬墓
何人樂憶鷓鴣鄉
莫因杯酒論千古
玉檢寒雲並北邙

登岱六首

縹緲琳宮接上玄
岩堯飛磴界蒼烟
峰迴洞壑紛俱拱

石圻松蘿曩自懸過雨雙龍爭玉峽壁雲孤鷲挂青天
莫言仲實無他技能誦相如最後篇

其二

翹首精神欲奮揚幾從開闔見陰陽千崖忽敞中原日
六月長飛使者霜在昔鈞天青帝坐即今封地白雲鄉
還應五嶽都游徧乞取安期火棗嘗

其三

軒轅皇帝有高臺鞭石千秋輦道開匹練天縈吳觀出

金泥日射漢封回西盤瓠子河如帶東挂扶桑海一杯
誰為登壇論王氣祇應塵世有仙才

其四

尚憶秦松帝蹕留至今風雨未全收天門倒瀉銀河水
日觀翻懸碧海流欲轉千盤迷積氣誰從九點辨齊州
人間處處襄城轍矯首蒼茫迥自愁

其五

僕衣吾欲卧天門中夜憑欄起自論半割乾坤懸對抱

低垂星斗亂堪捫狂呼六博仙人箸渴問三漿玉女盆
未必騶生真海外唯應漢史有崑崙

其六

壁立芙蓉萬古看削成松檜隱高盤中峰翠壓徂徠色
絕頂青收碣石寒梁甫吟成還自和茂陵書就欲誰干
依微白馬吳閭在欲向秋風問羽翰

送衡府葉教授還吳

臨岐斗酒意躊躇可向王門再曳裾此去穆生寧為醴

由來馮客總無魚白雲叢桂從裁賦秋色丹楓好著書
小艇太湖何限事野夫愁殺畫熊車

送王僉憲慎徵捧表入賀

奉使風雲擁傳車當秋海岱惜離居衣裳玉几堯天上
刁斗金河漢月初典容可收三表疏侍臣誰誦九齡書
何時大啓葡萄館萬歲稱觴樂有餘

送丘叅政若孚捧表入賀

波臣東海暫相逢星使明河迥莫從其道爾時青瑣客

可能猶記皂囊封
更衣却入金華省
罷酒還聽長樂鐘
聞說已懸新象魏
千門車馬日從容

于鱗歸絕不見客
而獨見余飲之酒
又走使捐餉
絨褐予以吳絲答之
而侑以詩

故人三徑新蓬蒿
鴈門太守徒爾勞
斗酒風塵白日薄
檄書海岱青天高
念欲報之吳縞帶
何以遺余秦復陶
千秋衣被各何限
世途往往稱緜袍

奉寄淮漕傳中丞三首

中丞鞭畫大江流計相權分少府籌共指星河出箕尾
即看淮海淨旄頭量沙月轉千帆夜飛粟霜凌萬庾秋
為問南征諸大將何人不讓漢蕭侯

其二

十年攜賦奏西京曾覩山公啓事名暫出雲霓同渴望

向來天地一澄清

公為考功熱
奸人殆盡

衣裳再數東方會

公由
山東

逸舟楫今懸聖主情聞道鯨鯢殊未侈可能身將伏波

兵

其三

著書空自舞千年徒倚雲霄望轉懸
歲晚陵陽依白壁
月明燕市泣朱絃
官微短削甘牛後
興盡歸心托鴈前
代馬亦知慚
伯樂蕭條首
管五陵烟

奉題行省呂相公清和軒

湖上春陰已覆墻
軒開恰傍紫微堂
青天對寫冰壺色
玉井微添水簾涼
門外豈無中散駕
席間猶識令君香
那能不作吾廬擬
短恰深杯百遍狂

念子相按部時日令子與折腰也亦愉快哉因賦
此為子與解嘲并遺子相兩面孔相向時將無一
失笑也

傳聞太守趨庭日握手青山思不禁海濶羣珠扶月上
天迴雙劍借龍吟詩篇且闕新秋色手板寧輸異代心
一自薊門風雨後歲星何處不浮沈

送汪太史振宗封衡世子還朝

屈指公車射策年忽看飛傳若從天崢嶸玉葉東秦後

縹緲金莖北極前，共惜衣冠星使去。
虛令鐘簾雪宮懸，祇應同姓諸王表。
親載齊閔第一篇。

中秋夕諸先輩邀飲使院有作

還馮蠟屐據胡床，不數南樓在武昌。
城外青山排坐入，月中瑤樹對分行。
呼來澠酒寒逾綠，歌罷齊謳夜未央。

古樂府有齊謳行

自是諸賢多意氣，留髡莫遣醉時狂。

其二

碣石談天未擬闌，秋空忽送桂輪看。
何人不問黃金粟。

上客無呼白玉盤
罷舞徘徊鸞扇曉
歸來縹緲鳳笙寒
還餘寡和江南調
長缺馮卿好借彈

其三

感管飛籌且遞催
使君殊不厭深杯
曲殘齊瑟雲俱住
詩就隋珠月並來
萬古泱泱東海色
諸公衮衮建安才
瓊漿只在芙蓉掌
欲賦甘泉次第裁

題徐汝思雲門山詩刻石後

拄笏高齋日幾迴
西山秋斲玉崔嵬
誰分使者連環去

却掩仙人射的來石作長庚懸露掌雲為閭闔倚天臺
綠君句好新題在不為桃花路始開

寄致仕尚書山陰何公

十年霄漢未蹉跎一疏風塵奈樂何健憶賀公辭紱晚
貧憐疏傅賜金多青天忽落持螯手白日殊私捉鼻歌
為問山陰春雪夜何時却放子猷過

送范使君視浙江學

栢梁誰為薦相如使者俄驚天上除但道聲名新岳牧

不知詞賦舊公車
春風絳帳諸生裏
粵海青山百戰餘
更是折衝多俎豆
可能兼采計然書

得張直卿叅政書有懷却寄

青門柳絲昔踟躕
使君五馬玉不如
北風吹殘厯下酒
南斗忽墮湘中書
山城虎豹日妨卧
水國鼉鼉誰與居
安得便呼從事去
相攜射取武昌魚

待劾未至信筆成二章撥悶并簡吳王二使君

今朝黃紙得如意
明日騎驢大道傍
任他錢刀吐氣象

肯為裘馬爭輝光東家女蘿附松老西鄰李樹代桃僵
男兒七尺會自管何用生死他人墻

其二

世人妬我金雙符天老贈之月五湖朱輪折買范蠡棹
紫袍脫贈黃公壚依舊豫章一男子不差高陽諸酒徒
雲霄故侶汝自愛白眼四望秋空孤

王僉憲慎徵入賀還

聞爾輜軒出帝鄉焦峽新闕迥相望金盤可更名承露

玉輦將無御總章異日諫書三木下何人揖客五侯傍
相逢信有多悲慨愁對寒雲正渺茫

追和于鱗汝思除夕之作

去矣年華不可留虛堂寂歷散蓮籌鐘聲未起千門色
杯酒仍牽隔歲愁海內風塵新白髮使君冰雪舊青州
不知濟上寒多少曲裏陽春已再酬

得子相七月書云頗有歸志率爾奉答

去鴈來鴻未可遲使君今擬挂冠期槭開白日芙蓉老

讀罷青天薜荔垂
大海春聲蕪鼓角
小山寒色隱旌旗
人間尚有王生在
俯首風塵病不辭

齊東王故邸懷舊游有作

尚憶梁園設醴辰
湘簾乳燕赤榴新
榴分安石珊瑚細
醴出中山琥珀醇
明月如懸飛蓋影
春風忽散曳裾人
何當華屋飄零句
把向羊曇醉裏論

敬美弟舉南宮喜而賦此

書來綵筆縱橫甚
此日春干氣象高
燕市總先騏驥骨

謝家殊有鳳凰毛
燈分太乙初
攜杖錦奪東方舊
賜袍為報汝兄真
長物不妨投劾
老林臯

弟甲次小後賦此慰之

俱傳射策動明光
露表金莖重渺茫
白雪不為天上調
朱顏翻倚市中粧
庭過長者無多轍
粟請侏儒共一囊
莫倚王家門第在
過江羞作尚書郎

鄒處士齋茂陵書來謁賦此贈之

蕭然落日半空除
矯首乾坤歎索居
有客相逢鄒衍似

停鞭為出謝莊書
梁園賦月才難老
稷下談天辨有餘
自是聖朝多隱逸
使君秋興滿樵漁

重登岱嶽四首

天矯雙旌引翠微
千崖欲絕至如歸
天門不散真人氣
河漢曾窺織女機
峽坼蒼龍仍對舞
峰迴碧鳳舊爭飛
唯應處處櫻桃發
似有珊瑚綴薜衣

其二

玉瑄銀瑱且莫從
孤筇信汝踏芙蓉
巖腰半捲垂虹帶

澗底俄懸落日春暑霽青天如對染寒歸白雪竟留封
靈芝只擘齋房種不向秦皇羨五松

其三

平楚蒼然萬里看不堪秋思罷馮欄三千自擁神仙宅
七十空傳聖帝壇北極垂衣閭闔遠中原回首夕陽寒
長餘一掬人間淚來日風塵未敢彈

其四

大火人間鬱欲流峩我蕭瑟吐高秋雞聲忽訝淮南過

鳥跡猶疑舜帝留
返照金泥時自躍
過雲石髓迥堪愁
君王未許東封奏
空向長安問子侯

夏日同皇甫開州游鄭氏園

看竹池亭雨後新
衝泥未怯往來頻
林間散髮逢玄晏
谷口停驂問子真
水淨芙蓉偏窈窕
天清鶴鶴自精神
將從傲吏金門隱
塵土應慚上角巾

壽少司寇何公

代應公

問俗熊轡出濟方
人云何武此淮陽
春迴太嶽千家雨

秋壓潢池一劍霜北極舊遺丹禁履西曹重檢白雲章
漢廷畫一吾真幸執法雙瞻帝座傍

送揚州李太史文請急省覲

春來錦纜滿江湖曾是甘泉賜沐殊當年聖主頒魚佩
今日親庭見鯉趨桂樹雲生淮海壯金莖月出漢臺孤
若到里門應早下花間或恐有前驅

奉寄容山駱師

佐郡賢聲海外傳鬢髮猶惜挂冠年浮名世已從呼馬

晚意時應付聽蟬種秫醉傾沈棗酒采菱歌汎鏡湖船
獨憐絳帳諸生列京洛風塵老鄭玄

送沈郎中守順慶

錦水征帆鼓吹開兒童騎竹郡符來星前舊壘餘巴國
雲裏孤亭擬峴臺

地有擬峴亭

峴色畫當槐府靜夷歌春讓

芋田迴祇憐花發邛筒美誰似仙曹對舉杯

答于鱗

旅病春深骨尚寒側身天地傍誰寬空令紫氣長浮嶽

不為青山並挂冠
萬里書成歸鴈失
何人歌罷片虹殘
亦知溝壑非吾分
未死人間事事難

其二

過君斗酒歷山田
醉後狂歌枕腹眠
倏忽風雲摧大陸
倉皇冰雪走幽燕
地分黍谷三光少
天入滄江萬古偏
雄劍自來多變異
不知霜色在何年

答明卿

廣柳車旁過暮春
五陵斜日見孤臣
吞聲對隕千秋淚

把臂驚存萬死身虛有風雷歸汗漫敢期滄海變逡巡
西來倘問平原館國士于今定幾人

其二

雪涕春風向路岐故人相對坐支頤驚心虎口時時在
回首羊腸處處疑三黜主恩元不薄餘生天意欲何為
知君未淺浮湘興肯為窮交暫緩期

答助甫

哭罷高天聽轉遙中原極目莽蕭蕭誰憐薊苑飛霜薄

不救秦庭赤日驕，事去幾人餘舊跡。
窮來何地折吾腰，虛勞九辨哀湘手。
慘淡浮雲未可招。

其二

行乞蕭條九市歸，薊門風雨狎鷄衣。
浮雲不盡時人態，白雪誰堪故侶非。
好去安危多肉食，怪來詞賦少雄飛。
夫君大有乾坤淚，莫向山陽笛裏揮。

答子與

家難飄零歲未還，幾驚雙鬢坐來斑。
槭飛白苧春前雪。

夢入青苔雨後山海內弟兄生死共天涯音信有無間
羞他桂樹叢叢長濁水清塵不可攀

其二

汝卧寒廬宿草平朝廷空問孝廉名長憐越石齊中獄
幾廢龐公若下耕萬里帛書械涕淚十年詞筆罷縱橫
援琴莫怪難成曲半入燕山風雨聲

哭子相

伏枕燕關氣惜悽驚魂忽破驛書題窺人魑魅驕相狎

入眼星河黯自低
歲暮中原無駿
裏春晴大海有虹霓
何言後死斯文在
七聖襄城路轉迷

其二

隕壁閩天紫氣微
十年空恨國工稀
猶餘明月人間號
不覩連城海上歸
及墓諸生封馬鬣
挑燈少婦泣牛衣
平生賸有遺書在
惆悵傳經心事違

寄家弟振美

余昨冬北徂
弟寔送余江潯
慟哭而別不謂區

區尚存此生然聞菟裘之地荆棘多矣書此志
憶且用相寬勉焉

江頭風色峭帆新江鴈銜蘆來往頻握手已非生別地
題詩還是暫時人天橫北海書難信日落吳門練未真
俗敝汝曹無可却時違豺虎即須親

答徐汝思

平原傳客至瓊瑤况有清尊破寂寥應謂酒人輕歲月
不將詩筆傍雲霄悲歌碣石虹高下擊筑咸陽日動搖

去矣使君須自愛莫因纍叟厭晨朝

其二

解組翻成滯帝都竄身何處覓江湖書裁北闕天逾遠
謳罷南冠雪轉孤孤父貧甘垂死飯鮫人泣灑報恩珠
因君忽憶登壇事腸斷遼陽塞草枯

承元肅叅軍見過用舍弟韻

忽漫星槎海上還問行杯酒惜朱顏何人勁節風霜後
屈指貧交天地間憊憶中原無白日愁聞故國有青山

毋論二仲能相挽烏雀柴門且自閑

元日試筆示敬美弟

處處崢嶸歲事新江村元日轉愁春
久拚梅柳能相負耐可椒花便劇親
病起雲霞聊借客窮來天地強稱人
相看未有成聲意即使吹篪亦損神

初春屏居訊問蕪廢有懷故人

卧病衡門逕轉深抱寒春日易成陰
江天陽鴈空雙度水國潛龍自一吟
欲往交游羞挂齒漸來名姓失關心

芝苓犯雪垂垂長短屐長鏡取次尋

得徐汝寧予與書云刻余擬古詩因答

憔悴悲吟大澤邊雙鴻忽下破春烟青山欲老潛夫論
白雪虛傳和郢篇萬里故人殊健在中原風色尚蒼然
相逢倘問行藏事自種要離墓畔田

答寄徐以言

憶昔公車亂後開當時諫草壓霜臺金雞北極驚孤下
威鳳中原好再來我自江湖甘落魄君知天地尚憐才

山陰蚤擬乘舟約莫遣王猷興盡迴

其二

折檻封章動九重匣中雙鏢鎖芙蓉歸舟剡曲家家雪
採藥天台處處峰
歲色平林空虎豹春聲大海起魚龍
向來雷雨皆天澤未許逢干地下從

其三

十載容城涕淚殘京山宰木夢仍寒批鱗北闕狂誰在
息翼南溟老自寬
何地可償明月璧故人還擬切雲冠

風江大有波濤思舟楫毋歌行路難



弇州四部稿卷三十六

欽定四庫全書

集部

弇州四部稿卷三十七

詳校官侍讀學士_臣陸伯焜

中書_臣劉源溥覆勘

總校官原任中允_臣王燕緒

校對官中書_臣張塤

謄錄監生_臣黃永澄

欽定四庫全書

弇州四部稿卷三十七

明 王世貞 撰

詩部

七言律九十首

春日同尤子求張幼于史叔載王復元舍弟敬美
過黃淳父分韻得花字

塵尾立言日未斜
隱囊匡坐自煎茶
尊前白雪中郎調

屋裏青山處士家千里驥心降付酒十年蓬鬢怯看花
浮生幸有江湖在莫遣風塵負歲華

又代子求賦得春字

柳色吳閭處處春徵君門館獨松筠別來綵筆堪誰健
書就玄經且未貧煮茗江風迴石鼎掃藤花雨映綸巾
綠醽最是能娛客可厭朝來問字頻

寄李于鱗

卜築新開濟水潯當門草色著書深歌成明月難酬壁

買罷青山有賜金，海內交游虛屈指。
天涯書素好論心，
豐城縱許干將在，斗氣蒼茫不可尋。

送楊都督之定海

開府兵符出帝州，即看魚麗擁春流。
越裳使者初闕

拜侯畫海鯨波迴，漢節垂天虹色吐。
吳鉤

麒麟倘有丹青事，莫放書生在上頭。

寄張幼于廬居

吳閭春望欲何如，張仲蓬蒿故有餘。
青史未荒游俠傳

幼于父任俠
余嘗傳之

白雲長卧孝廉廬
隔林幽鳥工催淚
擁榻

寒山好著書
解道王筠能辨
霓可無雙鯉示
郊居

華存叔暨猶子幼園數有慰和之詠聊此志答

華髮蕭蕭卧澗阿
洛陽芳草自銅駝
窮來白壁甘萋菲
病起青燈廢蓼莪
秋色儘饒歸計早
陽春翻覺和人多
濬冲豪興真垂盡
奈汝風流二阮何

辱存叔幼園和過黃淳父詩再疊奉答

論文握手夕陽斜
罷酒還呼顧渚茶
久自中原無後進

漸來江表見名家荆山月上人人玉大庾春生樹樹花
莫以機雲誇伯仲至今千載恨才華

吳江別子與先歸遲仲蔚未至辱見貽有答

長橋握手惜分離興盡東風獨解維落日汝耽元禮棹
碧雲吾擬惠休詩江天柳暝行人小澤國波寬度鳥遲
可向吳閭訪踪跡旗亭醕酎已多時

史叔載有見懷之什及貽所著二詠編有答

對酒春風芳草遠懷人東海碧雲飛吳門市舊多僂隱

高士星今擬少微書為窮愁翻早就身因戰勝轉堪肥
野夫事事俱成懶解把新編卧釣磯

周公瑕出示小像見者無不絕倒命余題焉因步

往韻

隱囊紗帽褐寬袍丘壑依稀亦我曹名似盧郎堪比玉
頰如裴令欲添毫朱顏雅負陽春在綵筆能令氣象高
不獨陶然君自好見來爭若醉醇醪

過葉子寅作

此日因君駐筍輿，即看騷雅未全疎。
劍題吳里魚腸字，帖辨征西蠹尾書。
鬪茗濤聲生几席，移牀山色在庭除。
幽蘭薜荔真成隱，尚有長楊問子虛。

寄嘉定楊司訓

楊嘗為吏部
又署州篆

談詩匡鼎舊名家，且為諸生擁絳紗。
吏部名仍懸日月，廣文官欲帶烟霞。
春風暫假專城綬，秋水猶疑上漢槎。
為問高齋今夜色，可無清夢到京華。

寄吳明卿邵武

襜被當年出漢庭中原秋色共飄零
吳天劍奪真人紫
閩海符分使者青
別後登龍愁自掩
道傍歌鳳好誰聽
因君更熟揚雄賦
憔悴風塵懶獨醒

楊子用舍弟韻見貽且及助甫舊游之感遂酬一律

共傳經術授諸生
賦就還聞動兩京
偶為吳閭新柳色
却憐張緒舊游名
江天暮靄空雲樹
漢苑秋風自露莖
池草總題那敢寄
五言君已號長城

得子與書有賣田之耗用舊寄田字韻為贈

西望菰城秋可憐故人秋興許誰傳微名歲月依稀盡
佳句江湖次第偏遼落生涯文是苑拍浮身世酒為舩
休將罷罷論歸橐已賣南山種豆田

同子與諸君游大司寇顧公箬溪書院分韻時公
不出且折簡見召

壺觴選勝一從容負郭堂開面面峰地擁菰城橫翡翠
天迴箬水浸芙蓉敢從門外題凡鳥曾向雲間識卧龍

抱日蒼虬雄對舞主人親植兩株松

得松字

其二

石峭亭虛瞰碧空振衣長嘯許誰同
千林瀑過初疑雨萬葉秋歸自起風
洛下名流唯白傅襄陽者舊有龐公
仍聞東閣高開宴不為登臨興易窮

得窮字

訪子與長興道中

客路逢秋倍可憐布帆如練挂蒼烟
綠醺若下堪滿盞紫鱗湖頭不論錢
千里敢言中散駕百年差勝子猷舩

懷賢徒倚孤吟發句就人間懶向傳

秋日再過伯寅作

清渠曲曲護蒼苔
啄啄衡門手自開
主在未須題鳳去
客頻寧為好龍來
牕前竹色分茶盃
徑裏橙香入酒杯
聞道西山月更好
可能乘興一登臺

解齋後過瞻美弟山池一首

杜門旬日偶初出
物色風光相映鮮
為問攢眉蓮社後
能無把臂竹林前
青山大可供詞客
新月殊堪費酒錢

報汝過從應更數莫教童稚厭周旋

次仲蔚韻題扇贈沈生

石頭城下草迷離夢裏分明玉樹姿
紈扇已題桃葉句白門空唱柳枝詞
裁將尺鯉羞人問鎖就雙蛾祇自知
腰帶休文渾欲減可無單舫慰相思

答于鱗

歲晏天高首重迴中原萬里一書來
崢嶸未病驚人筆黯澹長浮避客杯
鴈後江湖開氣象燈前風雨失時才

自憐身隱文馬用縱有微吟懶向裁

于鱗有重寄余兄弟作再答

客有將歸金錯刀暮雲寒色動江臯故人知未馴龍性
小弟憑誰與鳳毛名盡酒狂差自若病來詩態任兒曹
相聞不淺損篋思莫放陽春調轉高

寄題于鱗白雪樓

平楚蒼然萬木齊
峩飛閣岱雲低
峰頭玉蕊春長在
檻外金莖夜不迷
賦就梁園無左席
書來郢曲有新題

何人強責元龍禮不遣清樽我輩攜

其二

伏枕清秋海岱邊高樓中擘俯蒼烟同雲不盡千家曉
寒月長開萬古妍天上幾看新玉樹山中端合老朱紗
誇他信美仍吾土句就還應兩地傳

至日即事示舍弟

至後郊居殊可憐劇昏霾色隱寒烟戰餘天地心難識
剝盡陰陽氣尚偏海內厭長多事日山中僅有得歸年

開尊棣萼能明眼差勝悲吟劍嶺邊

魏濟南順甫寄過李于鱗之作

翩翩露冕擁朱軒十二諸侯濟上尊才大梗陽無訟獄
政餘元禮有登門齊風共許中原色楚些能忘大澤魂
楓葉寒雲空自晚欲將憔悴傍誰論

甲子元日試筆

今年雲日媚元正村徑衡門也自晴天地容吾新甲子
風塵少爾一書生樽前栢葉將遲得檻外梅花更劇明

但醉婆娑仍起舞不煩兒女歲時情

答吳邵武明卿

江城臘盡雨蕭蕭忽有鴻書破寂寥海內風塵仍岳牧
故人蹤跡滿漁樵休論往事才空老不為微名賤轉驕
東望浮雲真咫尺武夷寒色鎖岩堯

張善甫罷歸為酒要之

早時海國看除目晏歲雲霄已罷官宦後急流誰退勇
曲中行路古來難春盤入菜貧堪供社酒含椒醉不寒

今日可能相共否野夫園竹甚平安

寄少司馬丁公

十年曾見補天才誰遣留侯倦漢迴聽履星辰仍五嶽
拂衣湖海更三台牕前瀑布秋聲發鏡裏香爐紫氣來
莫以齊門稱國士劒歌空上闔閭臺

仲春望後二日與彭孔嘉章道華劉子威魏季朗
張伯起張幼于舍弟敬美過袁魯望遇雪探韻得

先字

袁安館卧連三日雷雨初晴雪可憐欲出龍蛇驚暫後
未舒桃李眩爭先十年空擅游梁席此夕俱傳倡郢篇
極目西山吾並老擬將春事傍誰妍

春日同彭孔嘉黃淳父周公瑕章道華劉子威袁
魯望魏季朗舍弟過張伯起幼于園亭探韻得梅
字

吳門忻接二難才况復筵從七子開句裏池塘今夜草
笛中春雪故園梅輕陰作潤花偏發薄暝將寒酒自催

別徑難忘仍易識野人芒屨頗能來

春日為西山之游仲蔚病不克偕貽詩見問率爾

有答

亞字城西春色來春江日日酒船開杖頭排比花間月
屐齒分踈雨後苔濟勝可無玄度具倦游空自長卿才
新詩句好堪惆悵擁鼻篝燈被底裁

與周公瑕袁魯望張伯起舍弟訪要離墓分韻得

幽字

杖策攜樽選勝游古墩殘堞境仍幽
十年草傍梁鴻淚
萬里潮分伍員本音運愁
病後風塵貪自保
醉來然諾暫
堪酬延陵故有遺祠在
暮色蒼茫未可求

橫塘春汎得餘字

杏臉猶含柳眼初
春江為帶月為梳
青油蕩水絲難挽
白苧和烟調未舒
妾住橫塘那用問
君收隔垞欲何如
越來東去無多路
飄瞥風波恨有餘

靈巖晚眺得思字

天啟峰迴入暝遲興來攜策未全疲
摩挲草暗琴臺色
徙倚風傳芡婦詞穿澗乍驚殘
磔響落霞猶似罷妝時
還聞越館仍陳跡極目凭欄重所思

虎山橋同魯望公瑕子求道振子念舍弟作得然
字

橋坐天空自爽然青山面面吐青烟
千花映水霞爭發
雙崦分流月對懸踞石醉呼光福酒
隔林歌起太湖船
不須指點論王氣麋鹿蘓臺更可憐

舊傳此地王氣沈
氏居焉偽吳士誠

鑿分為二崦

而族沈氏

卷三十七

銅坑看梅花作得何字

望來千玉綴烟蘿一水維梢香氣多峽坼峨眉全擁雪
風迴洛浦半凌波漁人只自能尋楚水部於今不姓何
惆悵角聲催暝色醉歸還和隴頭歌

月夜登虎丘作得無字

松挾春濤萬鐸呼忽看飛鏡挂浮屠穿池倒映芙蓉紫
立石寒侵薜荔孤不盡澄光行處得欲觀空色坐來無

生公倘有門徒在醉後藜牀許借扶

與舍弟及殷無美飲沙頭大梅樹下作

銅坑萬樹看不足沙頭一株春可憐霓裳黯淡初月上
玉鱗歷亂東風顛驕同白雪論先輩耻向繁英媚少年
但使酒糺苛亦得不妨今夜藉花眠

懷徐荊州子言却訪之因先寄

野人歸卧滄江頭衡門脩然何所求一榻頗為徐孺子
雙眼願識韓荊州即餘丘壑傍誰賞欲往烟波牽我愁

此日扁舟定相遇可容人喚剡溪游

徐荊州枉駕為詩見貽再答一章

暫解專城入梓鄉還將五馬問高陽雲霄偶自閒中失
湖海真堪醉裏狂愁向羊腸論故舊懶從蝸角辨行藏
微名已盡何妨老句就青山意轉長

君詩有江左詩名莫浪傳語

送王使君明輔遷陝西行省君有惠政於吳好談
禪理雅與余合故末章寄意焉

帳飲軍容滿道傍朱顏玉節自生光攀轅淚合吳天雨

立馬春開太華霜烏徙大江無列栢雉馴分陝有甘棠
炎風翔雪歸三表年少何須怨洛陽

其二

鈴閣翛然靜掩門還容塵尾共玄言能令白社塵中得
肯許青雲事外論何地可迴嚴武駕故人甘卧浣花村
唯應破却無生後不向秋風賦別魂

殷無美和余與徐荊州還往之作聊爾奉酬并申

別臆

婁江西望碧如絲來往扁舟慰所思青山總愛南州榻
白雪長飛郢里詞王掾不癡難自解殷生無恙爾何為
倘問別來堪寄憶汴東楊柳月低時

龔生夙脩淨土近以施藥膺冠帶之錫索詩為贈
衡門冠蓋一時新賜級爭誇及漢辰總道淨脩居士業
也應微現宰官身岐黃已自成餘事銅墨由來有勝因
我更新秋思漉酒從君乞取舊綸巾

殷無美應試留都賦此為贈

矯矯諸賢共論文殷生開美向來聞清詞祇和千秋雪
彩筆長干五色雲已自江東稱獨步還應冀北有空羣
男兒出處俱常事莫向青山問右軍

訪飲張憲副誠之遇雨張有作聊此奉酬

蕭灑圖書四壁間盤殮此日累君閑別來鄉國論今雨
語罷江雲失舊山擁砌踈花爭霰霖隔林脩竹弄潺湲
自聽張協愁霖詠不作王猷汎雪還

贈華存叔授官鴻臚

華有文章喜論世事而口微吃故云

十年投壁感知難
今見雲霄掌上
看業就韓非初著說
賦成揚子一遷官
春風故鬱含香省
曉月長懸典客冠
綿蕞漢儀君解未
建章新闕在長安

秋日同公瑕魯望及舍弟游支硎山得林字

秋色脩然祇樹林
人言避跡此山岑
中峰院廢空吳晉
石室泉流重古今
路盡丹楓時自引
壁危蒼蘚漸成侵
興來休問支公馬
萬壑寒雲一杖尋

游天池山得遙字

蕭瑟泓渟勝轉饒華池一鏡隱岩堯青蓮色借青天近
玉乳寒分玉洞遙樹底流雲停客棹竹間涼思滿僧寮
但容陶令無妨酒入社籃輿可待招

天平山飲廢寺還謁范祠作得名字

千級穿蘿望漸平萬峰擁笏驟相迎秋空月並蟾蜍吐
有萬笏林
蟾蜍石夜壑風疑虎豹驚荒草不傳蘭若跡古松猶

識范祠名自憐長誦先憂語拄頰看山盡此生

游木樨嶺得峰字

酒榼琴囊到處從，風微桂嶺晝溶溶。
倚身金粟光能滿，十里旃檀氣已濃。
靈隱不隨明月墮，小山長愛白雲封。
狂來一鼓三秋曲，亂插繁花過別峰。

一雲山小飲徐氏園歸途山中作得身字

入眼山家事事新，長松厯落踞蒼旻。
苔文剪綠移幽徑，竹色分青與近隣。
雙屐天容歸後態，一尊秋屬醉餘身。
莫愁斜照行相迫，但宿那能問主人。

雨中公瑕邀游石湖登治平寺作得來字

繫榜湖橋僻徑開，偶逢精舍鎖崔嵬。
蓮花倒插空中鏡，蘿薜長懸定後臺。
夕雨漸從茶磨斂，故人能載酒船來。
無煩聽講三生法，倚石看雲更幾迴。

贈章道華憲副

相逢慷慨欲如何，桐桂銘成鬢未皤。
病後風波無意改，歸來天地有松蘿。
名山禽向終應徧，小徑羊求好並過。
為問洛陽車馬客，千秋業就許誰多。

至日作

至後陽回萬象蘓荒村形影獨愁吾踈鐘似傍寒光早
步屨仍催返照孤縱飲江湖忘令節得歸天地尚窮途
雞豚自愛田家有肯向周京憶賜酺

虎丘寺同子與孔嘉淳父公瑕伯龍舍弟送別袁
魯望張伯起曾試北上得陽字

絕巘精藍半夕陽清尊別思倚蒼茫憑欄頓喜雲霄近
結駟毋驚道路長池擁雙龍元是劍天迴北斗盡成章
因窺鴈塔岩堯裏似有題名在上方

送袁魯望會試

把酒河梁白日垂，霜風游子重淒其。
十年藝苑稱先輩，此日公車未後時。
冀北人來金作帖，河東賦就色為絲。
中朝豈少鷓鴣行，舊肯向青山問桂枝。

送張伯起兄弟會試

結束翩翩指帝鄉，共將新賦獻長楊。
握中聯璧終收楚，天上雙星舊姓張。
題塔更聞誇鴈序，驅車今已出羊腸。
唯應仲蔚蓬蒿語，猶似連枝淚幾行。

讀樞筦集答寄蔡侍郎子本

憶爾曾都將相權欲將名姓勒燕然俱聽越石清秋嘯
不廢東山零雨篇卿月暫違雙掌露使星翻傍五湖烟
亦知劉白多移請洛下新詩大好傳

蔡時由兵
侍改留部

與徐汝南過許給事飲作許素精事饌是夕特窮
水陸暢飲至醉

今夕何夕興不孤錦堂燭煖紅珊瑚尊中若下誰可擬
眼底高陽何處無主人自為孺子榻下客叨入郇公厨

當門烏語樹將白猶自狂吟傾玉壺

贈梁伯龍

伯龍善詞嘗游荊州為王門上客

漢關題罷鬢初華梁苑文成席更誇
匣裏秋霜諸俠少曲中春雪舊名家
江陵客寫金樓子建業人歌玉樹花
誰道歸來仍壁立文君窈窕自煎茶

贈郭子

紫髯狐腋自翩翩萬里風烟指掌前
策杖天窮章亥步

然藜夜校景純篇城佳白馬時能識地暖青牛可再眠
好杜懸河吾薄曉吳山何地不堪憐

吳門遇子與見訪分韻得今字

吳閭寒望鬱蕭森李郭僊舟重古今千里關河誰命駕
百年天地此披襟中霄劒動延津氣白雪絃開郢國音
總道客星堪物色春來蘿薜恐難尋

歲除日遇雪

歲晏袁安卧自驚起看飛雪大縱橫千林艷奪梅花吐

萬戶寒催栢葉傾，懶廢久忘環珮色。
罷歸偏解薜蘿聲，但教隣叟能婪尾。
不怕殘年到幾更。

乙丑元日試筆

四十彊年耻自論，已將蕭鬢傲王春。
不爭兒輩屠蕪酒，長愛人間草莽身。
病起青陽開浩蕩，歌回白雪鬪嶙峋。
是日大雪初霽相知料理新正事，第一斜川把釣綸。

汝南周令嘗師事楊用脩太史，而善于鱗及明卿。
子與輩千里貽書言志，聊用酬答。

抱耒滄江萬態捐，忽逢僊令尺書傳。
關門不閉吳天紫，弟子能師蜀國玄。
琴裏高山流輩少，握中明月故人偏。
還應彩筆相酬處，花發河陽第幾年。

其二

屈指當年有壯游，中原星色散吳鉤。
龍門客在參差老，鳧令書來次第收。
聞道汝南多月旦，何人鄴下擅風流。
莫言文苑男兒業，寂寞江河萬古愁。

題周令君太霞洞天

色界雲蒸薄帝關赤城標起異人間榮光倒射昆明水
積綺長飛玉案山瀲灩乍疑天酒熟飄颻如覩翠旂還
亦知勾漏非君意為有丹砂好駐顏

贈陸生生嘗從軍得官而善按摩多戲術

翩翩裘馬俠兒風青眼人間計未窮早歲散金收劍客
中年殮玉禮壺公顏從熊鳥方中駐樽向魚龍戲裏空
日月任他雙轉轂江湖隨意一飄蓬

包參軍登岱還訪余海上將還四明因贈二律

包子東歸四五春杜門高枕避風塵遙扶一杖窺星斗
忽買扁舟破隱淪海內青山唯此嶽天涯白雪更何人
還應落日登諸觀曾見吳門匹練新

其二

客來身挾烟霞氣云宿天門最上頭夜半忽懸滄海日
封中倒瀉絳河流行時向子無婚嫁歸後宗生好臥游
為有故人餘興在不隨風馭訪丹丘

元夕雨過楊開府作

今年元夕饒風雨
即有清樽興未孤
不夜烟花長自合
先春火樹忽全敷
中天月避銀燈吐
高閣寒催玉漏徂
總為將軍愁醉尉
野夫那怕李金吾

寒食即事作

今年寒食寒未花
驟雨驕風使我嗟
東村柳條乍努眼
西渚蘆筍僅抽芽
已聞回首失親故
况乃轉盼摧繁華
伯輿為情終不淺
時復扶攜過酒家

沙頭大梅花下醉仍賦近體一章

二月已破梅始開千枝萬枝白毡毳初疑雪壓羅浮小
忽憶寒從隴首來素腕不禁愁裏笛玉顏偏愛掌中杯
向來曾醉參橫夢惆悵誰當水部才

寄德甫

余郎閉戶草潛夫懶向羊腸說故途入獄豐城元有劍
罷侯新息本無珠中年事業俱三徑昭代文章自五湖
為問吳張冠冕在可能搔首一吟無

過華師學士作

此日仍叨杖屨從向來名姓憶登龍書成綵筆誇玄草
家近青山比素封海內聲名時睥睨故人文酒日從容
絕憐身似彭宣慙許醉華堂第幾重

李子任俠好施予有古朱家劇孟風而文采勝之
忽過余下榻留連竟日其空谷之慰可知也因賦
近體一章贈之

十年裘馬自從容肝膽中原惜未逢倦後蓬蒿尋仲蔚
見來湖海失元龍青山半入囊中草明月長寒匣裏鋒

震澤烟波三萬頃酒船詩卷莫辭從

贈邵都閩

天濶千帆霽色多一麾魚麗滿江沱
輕裘似學羊開府高柱仍聞馬伏波
業盡黃金歸劍客功成青簡有鏡歌
草堂新傍花溪好倘許元戎小隊過

送殷無美聘郭將軍記室作

當時七子擅詞場書記翩翩爾最良
聞道將軍移下瀨可無飛檄掃扶桑
酬來趙璧渾如月說罷吳鉤已是霜

總為幕中多貴客古今唯有郭汾陽

王參政明輔為余刻姓名太華絕頂以墨刻見示

賦此為謝

嶽色褰帷面面新
叨將姓字上嶙峋
寒光忽映蓮花掌
清夢翻添玉女顰
自是金天來使者
空勞紫氣擬真人
坏居總抱袞闕恨
婚嫁那能繫此身

助甫宦楚久不得書賦此為寄

高枕滄江歲屢移
渚宮旌節未應遲
虛勞白鴈三湘轉

依舊青山九處疑，老去交游隨態失。
惟來辭賦畏窮知，吳門豈少耕桑侶。
為憶燕臺握手時。

贈莫山人之建康謁蔡侍郎

十年如罄著書忙，此日攜書走建康。
蠟屐仍堪朱雀雨，褐衣偏傲白門霜。
窮時荃蕙須防化，暗裏驪珠且慎藏。
解道相逢誰倒屣，只今猶有蔡中郎。

病秋

年年頗詫逢秋健，今日秋來興漸孤。
不獨窮愁畏搖落。

即防衰骨費支吾，驚心屢却青菱鏡。
避客兼嗔白玉壺，猶有苦吟成宿業。
此生那用借詩扶。

八月十八日觀潮，季生所潮不甚漲而飲甚適，有作。

雪山東控海門流，望裏微茫迥更愁。
八月虛傳枚叔賦，十年欲散伍胥讐。
干雲彩鷁帆徐展，夾浦朱簾雨盡收。
唯有汪倫偏解我，還將水調按歌頭。

仲蔚過余將別而公瑕適至，歡飲有作。

秋月垂缺秋花開
俞子欲別周子來
此我平生最如意
故人相聚未論才
江烟漠漠魚蝦市
夜色沉沉鸚鵡杯
總道柴門甘寂寞
客星今已傲三台

寄于鱗書不得報問之

病起商秋鬢色殘
中原鴻鴈轉艱難
豈應郵客皆殷羨
自覺朋車未呂安
湖海窮途雙掩涕
風塵高枕一加餐
莫言同是藤蘿侶
不盡青天泰岱寒

子與得滄運有詩見示因答調之

弇州四部稿卷三十七